

23 MAY 2000

Muhammad-MCA

PARTI KOMPONEN BN JANGAN GUNA PENDEKATAN UGUT, KATA MUHAMMAD

PETALING JAYA, 23 Mei (Bernama) -- Naib presiden Umno Tan Sri Muhammad Muhammad Taib berkata parti-parti komponen Barisan Nasional (BN) tidak harus menggunakan pendekatan mengugut untuk mendapatkan sesuatu.

Katanya, sebagai sebuah parti komponen BN, MCA perlu menyelesaikan masalah dalamannya secara dalaman juga melalui penerangan dan penjelasan kepada para anggota parti tentang mengapa kuota parti itu dalam kabinet, misalnya, dikekalkan dalam keadaan apa sekali pun.

"Pada suatu ketika dahulu, MCA pun menghadapi masalah dan banyak kalah dalam pilihan raya tetapi kuota MCA dalam kerajaan tidak pernah diturunkan.

"Sewaktu pilihan raya 1990, 1995 Umno menang besar tetapi kuota MCA dalam Kabinet kekal sama, tak pernah dikurangkan dan tak pernah kita menambah sewenang-wenang kuota Umno," katanya pada persidangan media di kediamannya di Kelana Jaya petang ini.

"Kita kena menunjukkan satu tindakan yang sesuai, yang mementingkan kekuatan BN itu lebih daripada kekuatan mana-mana parti komponen. Kita berharap pihak-pihak yang tertentu menenangkan suasana, bukan mengeruhkannya," katanya.

Muhammad, yang menyatakan rasa dukacita dengan keputusan presiden MCA Datuk Seri Dr Ling Liong Sik untuk meletak jawatan Menteri Pengangkutan, mahukan parti itu mengutamakan semangat setiakawan bagi mengukuhkan BN.

"Dalam kita menghadapi pilihan raya kecil Parlimen di Teluk Kemang ini, kita rasa tumpuan hendaklah diberikan untuk memenangkan calon BN di Teluk Kemang.

"Apa yang berlaku ini adalah satu peristiwa yang tidak dialu-alukan dan kita berharap sebarang masalah dalam mana juga komponen BN hendaklah diselesaikan secara dalaman dan janganlah menggunakan faktor menggugut ini untuk menyelesaikan masalah dalaman," katanya.

Beliau berpendapat sokongan masyarakat Cina kepada BN dalam pilihan raya lepas bukan semata-mata kerana kekuatan MCA, tetapi kerana mereka menyokong dan mendokong Perdana Menteri Datuk seri Dr Mahathir Mohamad selaku Perdana Menteri dan pengerusi BN.

"Saya fikir kebanyakan ahli MCA dan orang Cina menyokong kerajaan dahulu kerana kepimpinan Dr Mahathir, tindakan-tindakan yang dibuat oleh Perdana Menteri, cara menyelesaikan masalah kewangan negara, cara menyelesaikan kegawatan ekonomi, memperkenalkan dan mengekalkan kawalan matawang dan banyak tindakan yang dilaksanakan oleh Dr Mahathir," katanya.

Muhammad berkata, tindakan Dr Ling meletakkan jawatan kabinetnya tidak akan menyelesaikan masalah dan keadaan itu tidak menguntungkan sesiapa, malah boleh merugikan BN.

-- BERNAMA

AFY AHH